

## **Gion Antoni Cavegn - Maissen**

20.09.1918 - 13.08.2003



Viver ina liunga veta e star sauns per lu in di puder murir senza stuer pli ditg pitir, quei ei in ideal dil qual biars carstgauns mo sieman. Tier in tal cass havein la moda da dir, quella ni quel, quels han giu ina biala mort. Gie, dat ei insumma ina biala mort? Jeu sai buc!

Gion Antoni ei naschius ils 20 da settember 1918 a Rueras sco quart affon dils conjugals Maria Barla e Lucas Cavegn-Gieriet. Leu ha el passentau ina biala ed emperneivla affonza, carschius si en cumpignia da ses frars Christian e Tumaisch sco era la

sora Marionna. Pli tard ein aunc quater frars ed ina sora suundai. Sper ils geniturs han la tatta Marionna e gl'aug Tumaisch Monn da Cavorgia giu quitau per in bien ambient en ina buna famiglia cristiana. Suenter haver frequentau las scolas dil vitg suondan in per onns da scolaziun a Mustér e Sviz. Finida la scola da recrut a Thun entupein nus Gion Antoni en survetsch militar tier ils survigiladers da fortezias a Tusaun. Leu ha el passentau ina gronda part da ses megliers onns e forsa giu in tec quet cu il maior Riedi ha honorau el cun las cordas d'appuntau.

La distanza denter Tusaun e Domat ei buca zun gronda. A Domat ha il Gion Antoni entupau la giuvna Babeth Maissen. Il settember 1948 han els dus festivau las nozzas a Rueras. Treis feglias Silvia, Tina e Vrena han preparau per legria e lavur en casa. Quellas han lu pli tard procurau per ils fegls e tschun beadias daventan la legria per tat e tatta. Cul temps baghegian Babeth e Toni ensemens cun frar e quinau Placi sco era tatta ed onda Maissen en la periferia da Domat in'emperneivla casa cun treis habitaziuns situada en in vast curtgin. Cun curascha e fidonza surpren dunna Babeth gl'onn 1968 ina fatschenta da textilias a Cuera. Tut gartegia e marscha bein e Gion Antoni banduna la plazza tier il militar per era segidar en fatschenta.

Da siu liug nativ, dalla biala Val tuatschina ha il Gion Antoni denton mai propri saviu sedistaccar. La pusseivladad ei sedada e spert ha el acquistau ina habitaziun en la casa «Untgida» a Sedrun. Siu refugi a Sedrun ha Toni schazegiau fetg e passentau leu bia bials dis ed jamnas. Cun egls activs ha el persequitau il svilup, il far e demanar en sia cara Val.

Haver in tec luschezia ei negin puccau. Loschs ei Gion Antoni schon staus cu el ha enderschiu il fevrer 2003 ch'el seigi daventaus basat dalla pintga Alina a Cuera. Gl'uost da quest onn ha Toni aunc festivau cun ils da Rueras la fiesta dil cor da Maria. La participaziun alla fiesta dil vitg da Rueras ils 30 d'uost era previda. Denton ei era destinau autr'uisa. Ils 13 d'uost 2003 ha il Gion Antoni anetgamein bandunau quest mund e quei senza saver prender comiau e dar adia a sia famiglia, a ses parents ed enconuschents. Ei ha fatg mal! Denton nus tuts sperein in di sin in bien seveser e vegnin a salvar Tei en buna memoria.

Ruaussa en pasch.

Tiu frar Placi